

18. august 2009

UKA 2009/34

Inatsisissatut siunnersuummut oqaaseqaatit

### **Naliginnaasumik oqaaseqaatit**

Illuliorititernermut aningaasalersuineri inatsimmi periarfissarititaasoq 20/20/60 najoqqutaralugu aningaasalersuineq siunertani malillugu ajunngitsumik ingerlanneqarsimavoq, inuppassuarnullu namminerisaminnik illutaarniartuni iluaqusersiisimavoq.

Taammakkaluartoq aqqissuussineq annikitsunik ajornartorsiutitaqarpoq. Pineqartoq najoqqutaralugu illuliorititsisunit atonerlunneqarsinnaanera tamakkiisumik mattunneqarsinnaasimangilaq, pisortat tapiineratigut inissianik atartortitsisartut attartortitsinerminni iluanaarniapiluttut illuliornerinut taarsigassarsitinneqartartut, kingornalu akisoorujussuanngorlugit akilersillugit attartortittakkaminnik.

Illuliorititernernut aningaasalersuineq pillugu Inatsisartut peqqussutaanni § 9, imm. 4 malillugu aalajangersagaavoq, tarsigassarsiaasut, naalakkersuisunit kommunalbestyrelsiniillu nutaanik illuliornermi tapiissutigineqartut (taarsigassarsiat erniaqaratillu taarsersugassartaqanngitsut ukiuni 20-ini atuuttut), akilerneqartussaapput, taarsigassarsisimasup illu attartortippagu ”piumasaqaatit, inatsisartut inimit attartortitsinermut peqqussutaannut akerliusumik iliuuseqarneranut”.

Taannalu isumaqarpoq killeqartoq qanoq annertutigisumik attartortitsisoq iluanaaruteqassanersoq. Ajornartorsiullu uaniiginnarpoq, attartorneq pillugu peqqussut taammaallaat attartortoq inuinnaappat.

§ 33, imm. 1 Inatsisartut inimit attartorneq pillugu peqqussutaanni aalajangersagaq imaappoq, nammineq illuutini attartortitsinermi aki aalajangersarneqassasoq aningaasartuutaasimasut tunngavigalugit, taammaasilluni akiliutigineqartussap aningaasartuutaasut qaangerlugit akiliisitsisoqarsinaannani, ingerlatsinermut aningaasartuutit uppersarneqarsinnaasut tunngavigalugit kiisalu ilanngunneqassallutik illup nammineq teknikkikkut naliliinermi nalingata qaffariarnera annerpaamik diskontop qaffariarnerata affaanik.

Ajornartorsiullu uaniiginnarpoq, attartorneq pillugu peqqussut taanna taammaallaat atuuppoq attartortut inuinnaappata.

Taannalu toqqaannanngikkaluartumik inatsisartut illuliortitsernermut peqqussutaannut § 9, imm. 4-imut sunniuteqassaaq, taarsigassarsisimasup najugaq attartortissinnaammagu annertoorujussuarmik iluanaarutitalimmik, pisortanit erniaqaratillu taarsersugassartaqanngitsunik taarsigassarsiaasa akileqquneqarneranik kinguneqartinneqarnatik, najugaq attartortikkuniuk *inatsisitigoortumik piginnaatinneqarsimasumut*, soorlu assersuutigalugu suliffeqarfinnut imaluunniit pisortaqaqfinnut inissianik amigaateqartunut attartortitsigaangata.

Siunertap 20/20/60 atorlugu illuliortitsernermi siunertarineqanngilaq pisortat tapiissutaat aqcutigalugit inissianik inunnut attartortitsisartut iluanaarniapilunnissaannik. Taammaattumik pisariaqarpoq illuliortitsinermut aningaasalersuinissaq pillugu inatsisartut peqqussutaata allanngortinneqarnissaannik.

Peqqussutissatut siunnersuutip massuma kingunerisussaavaa, pisortanit tapiiffigineqarluni illuliortitsinermi tapiissutit akileqquneqarnerinik, akiliutigineqartussap naatsornerani qummut killigitaasussaq qaangerneqarsimappat, soorlu inimik attartornermi peqqussummi najoqqutarineqartut assigalugit attartortoq inuinnaappat.

#### Pisortanut aningaasatigut allaffissornikkullu sunniutissai

Naatsorsuutigineqanngilaq siunnersuut pisortanut aningaasatigut allaffissornikkullu sunniuteqarnissaannik. Naatsorsuutigineqarsinnaavorlu, siunnersuutip kinguneranik Nuummi inissianik attartortitsisartut akigititaminnik appaanissaat, tamatumalu kingunerisinnaavaa pisortat sulisuminnut ineqarallartitsisarnerinut aningaasartuutigisartagaasa annikillineqarnerinik. Killormullu aamma pisoqarsinaavoq, tassalu ineqarallartitsinermut akiliutaasartut qaffannerinik, siunnersuutip inissianik sanaartornerup annikillisinneqarnerata kingunerisaannik annertunerusumik ineqarallartitsisarnermi akunnittarfinnik atuisoqarnerulernissaa naatsorsuutigineqarsinnaammat.

#### Pisortaqaqfinnut kattuffinnullu tusarniaanerit.

Siunnersuutip saqqummiutinnginnerani pisortanit kattuffinnullu tusarniaasoqarsimanngilaq. Siunnersuutigineqassaarli, naalackersuisut siunnersuutip aappassaaneerneqannginnerani kissaateqarfigineqassasut, pisortanut kattuffinnullu attuumassuteqartunut il.il. tusarniaanissaannik, taamaasillunilu tusarniaanermit akissutigineqartut ataatsimiititaliap suliassaminut ilanngullugit sulariniassamatigik.

### **Inatsisissatut siunnersuummut oqaatigiumasat.**

#### *§ 1-imut*

Imm. 1-imut

§9, imm. 4, illuliornermi aningaasalersuineq pillugu peqqussummi atuuttumi aalajangersarneqarpoq, pisortanit taarsigassarsiat, nutaanik illuliornermi, akilerneqassasut, taarsigassarsimasup inigisaq attartortippagu naatsorsueriaatsit ineqarnermut akiliutaasartup aalajangersarneqarnerani, inatsisartut peqqussutaat malinneqarsimangippat.

Kisiannili tassa attartornermut peqqussut taamaallaat atuuppoq attartortoq inuinnaappat.

Siunnersuutigineqartup kingunerissavaa, § 9 (imm. 1), nr. 4 inimik attartornermut allanut atuutilissaaq, attartortumut inatsisitigut piginnaatitaasimasumut, soorlu A/S-inut pisorta qarfinnulluunniit attartortitsinermi.

Taassalu imaalissaaq, pisortanit taarsigassarsilluni illuliornermi taarsigassarsiaasimasut akilerneqassapput, attartortitsisup inatsisitigut piginnaatinneqartumut, attartortitsisullu akigitinneqartumut sanaartornermut aningaasartuutigisimasani qaangerlugit akiliisitsippat, ingerlatsinermit aningaasartuutit uppersarsarneqarsinnaasut tunngavigalugit kiisalu ilanngunneqassallutik illup nammineq teknikkikkut naliliinermi nalingata qaffariarnera annerpaamik diskontop qaffariarnerata affaanik.

Tamatumalu assigaa, inuinnarmut attartortitsinermi inatsisitigut illersorneqarsinnasumik inissisimalerneranik.

## § 2-imut

Allannguutit ull. 1. januar 2010-mi atortuulissasut siunnersuutigineqarpoq.